

## **Der allmächtig Gott hilft Jerusalem uuf**

<sup>1</sup>Halleluja!

Ja, es isch guet, für üse Gott z singe,  
es isch schön, ihm es Loblied aazstimme.

<sup>2</sup>Der Herr bouet Jerusalem wieder uuf,  
di verströite Israelite bringt är wider hei.

<sup>3</sup>Är heilet die, wo ne ds Härz bbroche isch,  
und är verbindet ihri Wunde.

<sup>4</sup>Är seit, wivil Sterne dass es git  
und git emne jede sy Name.

<sup>5</sup>Gross isch üse Herr und mächtig a Chraft.  
Sy Wysheit überstygt jedes Määs.

<sup>6</sup>Den Elände hilft der Herr uf d Bei  
aber di Gottlose drückt är a Bode.

<sup>7</sup>Stimmet em Herr es Danklied aa,  
spilet uf der Harfe für üse Gott.

<sup>8</sup>Är deckt der Himmel mit Wolche zue  
und lat's rägne uf der Ärde,  
dass ds Gras wächst i de Bärg.

<sup>9</sup>Är git am Veh sys Fueter,  
und de junge Chräaje das, wo sie derna brüele.

<sup>10</sup>Am Ross gfallt ihm nid öppe sy Sterchi,  
nid d Wade vo de Manne mache ihm Fröid:

<sup>11</sup>Em Herr gfallt die, wo Ehrfurcht vor ihm hei,  
die, wo uf sy Güeti plange.

<sup>12</sup>Jerusalem, tue der Herr rüeme!

Juble dym Gott zue, Zionsstadt!

<sup>13</sup>Är macht, dass a dyne Tor d Rigel fescht  
bschliesse

und sägnet dyni Chinder zmitts i der Stadt.

<sup>14</sup>Är macht, dass du Fride hesch im Land,  
dass du di chasch satt ässe am alleribeschte  
Weize.

<sup>15</sup>Är schickt sys Gebot uf d Ärde.

Das Wort louft unerchannt schnäll.

<sup>16</sup>Är schickt der Schnee, wi we's Wulle wär,  
är ströit Biecht uus grad wi Äsche.

<sup>17</sup>Är schiesst Ysch uf d Ärde mockewys.

Vo syre Chelti gfrüürt ds Wasser.

<sup>18</sup>Är schickt sys Wort und macht se z schmelze,  
sy Huuch lat är la wääje, da rünelet ds Wasser.

<sup>19</sup>Är het em Jakob sys Wort verchüntet,  
syni Gsetz und Rächt em Volk Israel.

<sup>20</sup>Nid mit jedem Volk het är's eso ghalte,  
niemmer süsch gchennt syner Gsetz!

Halleluja!

*Psalm 147 na der bärndütsche Übersetzig*